

四庫全書

史部

欽定四庫全書

史部

景定建康志卷三十六

詳校官監察御史臣沈孫璉

檢討臣德生覆勘

總校官檢討

臣

何思鈞

校對官中書

臣

張曾炳

謄錄監生

臣

陳燦

欽定四庫全書

景定建康志卷三十六

宋 周應合 撰

文籍志四

露布

曹彬平李煜露布行營馬步軍戰棹都總管宣徽南院  
使義成軍節度使臣曹彬等上尚書兵部臣等聞天道  
之生成庶類不無雷電之威聖君之統制萬邦須有干  
戈之役所以表陰慘陽舒之義彰弔民伐罪之功我國

家開萬世之基應千年之運四海盡歸於臨照八紘皆入於提封西定巴邛復五千里昇平之地南收嶺表除七十年僭偽之邦巍巍而帝道彌光赫赫而皇威遠被頃者因緣喪亂分裂土疆累朝皆遇於暗君莫能開拓中夏今逢於英主無不掃除惟彼江南言修臣禮外示恭勤之兒內懷姦詐之謀况李煜比是騃童固無遠略負君親之煦育信左右之姦邪曾乖量力之心但貯欺天之意修葺城壘欲為固守之謀招納叛亡潛萌抵拒

之計我皇帝義深含垢志在包荒擢青瑣之近臣降紫  
泥之丹詔曲示推恩之道俾修入覲之儀期暫詣於闕  
庭庶盡消於疑問示信特開於生路執迷自履於危途  
託疾不朝堅心背順士庶咸懷於憤激君親曲為之優  
容但矜孤孽之愚蒙慮陷人民於塗炭累宣明旨庶俾  
自新略無悛悟之心轉恣陸梁之性事不獲已至於用  
兵大江特叛於長橋銳旅尋圍於逆壘皇帝陛下尚垂  
恩宥終欲保全遣親弟從鑑歸回降天書委曲撫諭務

從庇護無所闕焉終懷蛇豕之心不體乾坤之造送蠟  
書則勾連逆寇肆兇徒則劫掠王民勞我大軍駐踰周  
歲既人神之共怒復飛走以無門貌貅竟効其先登蟻  
虱自悲於相弔臣等於十一月二十七日齊驅戰士直  
取孤城奸臣無漏於網中李煜生擒於麾下千里之氛  
霾頓息萬家之生聚尋安其在城官吏僧道軍人百姓  
等久在偏方困於虐政喜逢盪定皆遂舒蘊望天朝而  
無不涕洟樂皇化而惟知鼓舞有以見穹昊助順海嶽

知歸當聖朝臨御之期是文軌混同之日卷甲而兵鋒  
永戢垂衣而帝祚無窮臣等俱乏將材謬司戎律遙稟  
一人之睿略幸成九伐之微勞其江南國主煜并偽命  
臣僚既就生擒合將獻捷臣等無任歌時樂聖慶快懼  
呼之至謹奉露布以聞

表狀

張詠到任謝表臣詠言伏奉六月二十七日勅差臣知  
昇州軍州兼提舉江南東路兵馬巡檢捉賊公事已於

八月二十二日到州署事訖恭以道有所存物無不遂  
臣縈宿疾分合退身皇情重惜其辭榮大鎮許從於卧  
理感深出涕恩極難言中謝臣聞昔者聖君之御人也  
博愛溥施包荒濟美九有仰大中之化羣倫無不達之  
情伏惟皇帝陛下恭已臨朝推誠接下英斷比於太祖  
寬仁類於太宗謂選能為共治之資則躬行採錄謂節  
用為恤民之本則慎乃盤遊加不忘功兼之念舊有若  
陳緯苦戰田錫直言越次褒延驚駭視聽梁周翰前朝



名輩邢昺望苑元勲俱及老年不許去位非常禮遇優  
與俸錢四海之人聚首而議以為陛下之德有以繼舜  
齊堯輝宗映祖若周文之兢持未足多也書美昌言禮  
貴養老未為可也雖聖政無涯不可妄紀而生民受賜  
抑又何名竊念臣本族無稱學文自任爰從中第洎至  
登朝徒切勵精少防於責實絕無朋比曲借於餘光凡  
四轉官便叅樞要復三數歲已忝丞郎信明時驟進之  
身過往哲九遷之遇退量淺劣不稱叨揚止在捐軀聊

以報國重念臣少因酒過晚覺病多仰天眷以撫安煩  
國醫之診護其如氣候漸劣根本難瘳既乖侍從之儀  
寔玷衣冠之列豈敢便謀致政堅請分司重閣輒拜於  
封章小郡覬全於頤養不謂睿慈惻愍兌澤霑濡作藩  
更委於兵權起任仍兼於水路而復中官賜藥內府支  
金謂九轉之靈丹可延性命謂三錢之祕寶足了生涯  
天意所鍾愚臣備識必將垂世流為美談知微臣遇主  
之榮比肩舊老廣陛下愛人之旨接武前皇臣雖事上之

少勞陛下待臣之已甚而況江山秀絕民物駢繁獄訟  
簡清事務整集上仗神妙之力下因僚吏之勤望保殘  
年再覩雙闕此愚臣之願陛下之恩也既感陛下憂臣  
之身臣敢不憂陛下之事一欲宣導風化惠綏黎元兼  
令克忭之人漸識淳和之理憑茲懇款上答恩休云云  
張詠謝撫問狀右臣四月日侍御史趙湘到州奉傳聖  
旨撫問臣治郡不易頭上瘡子痊否祇荷寵靈不任感  
懼竊念臣素昧攝生早踈戒酒因成癖飲薄在中焦療

之雖得暫通食後依然復改引不歸胃傳之入頭積鬱  
既多瘡痛斯見醫工切脈惟云五臟以皆安瘍人傳膏  
未覩一毫之為減蓋由臣光陰遲暮氣血衰微諒難盡  
保於痊平祇可更堅於調護而幸官曹知勸黎庶輕徭  
兼緣靜治之時希有撓心之事覬延算數上奉君親伏  
蒙皇帝陛下曲賜軫憐遠加安撫手舞足蹈似非多病  
之身寵異榮深不類具臣之列得不恭遵善訓懇守冲  
和勵益壯之筋骸了旋生之公事少分憂寄以報鴻私

云云

又謝傳宣問失火及安撫人戶事狀右臣今月十四日  
得入內侍殿頭郝昭信到州傳宣王智家失火卿何  
不早與救滅致傷人口仰安撫人戶者拜命之次驚懼  
失圖竊念臣謬處要官叨知大郡雖切向公之志全無  
利物之能况當州經偽號之餘庶事失酌中之理街衢  
徧隘諒車馬以纔通屋宇低徊復茅竹之相雜一昨陽  
春始半時雨稍愆烈焰忽飛狂風併作人不及走目不

暇旋一食之間十室俱燼雖有貔貅之士叅以保甲之民衆力同馳百心一濟併防庫務及護衛城猛勢之中幸而獲免皆疑天火或說人災寔由郡政之未孚致使災靈之不祐俾民罹禍貽君遠憂臣合自疏愆尤請行典憲甘從深譴以謝無功伏蒙皇帝陛下特遣近人遠傳宥命撫安居戶奠祭亡魂被苦之家已識哀矜之意垂白之老兼聞感泣之聲臣敢不益勵赤誠恭求要道期收來效少贖前非臣與經火戶人無任感天荷聖激

切屏營之至云云

曾肇到任謝表臣肇言伏奉勅命差知江寧軍府充江南東路兵馬鈐轄臣已於今月二十四日到任訖七旬魏闕未償去國之思五月彭門曾乏近民之政忽奉除書之賜更叨易地之優蒞事云初省躬知幸中謝竊念臣學術不足知古而早塵侍從之班治行亡以過人而屢忝藩宣之寄矧六朝都邑之舊有四面山川之雄舟楫往來幾半天下師屯節制寔總江東屏蔽王都控帶

南國折衝禦侮自昔固難其材宣化承流於今尤遴其  
選豈伊疲輒可副咨求此蓋伏遇皇帝陛下禮遇臣隣  
惠綏黎庶謂臣偶綴朝廷之近職是宜假寵於名城以  
臣粗知仁聖之用心因使分憂於遠服謹當夙夜匪懈  
奉行寬大之書惓惓無華希慕循良之迹庶收綵髮之  
效少稱丘山之恩臣無任感天荷聖激切屏營之至云  
云太皇太后詞同

汪藻到任謝表戎車未殄方勤盱食之憂將鉞分臨誤



忝方維之寄任非所可委莫獲辭伏念臣頃緣病衰自  
投閒散田廬退屏歲月再更當踐土之未還念朔方之  
猶熾既不能負羈紲以從奔走之役又不獲執干戈以  
宣屏衛之勞誰意眷慈猶叨寄省惟六朝之舊國控三  
路之要津代馬飲江已兆佛狸之死秦兵出項難逃淝  
水之誅但愧尪殘知難勉強恭惟皇帝陛下志存宗社  
德冒華夷憤中原之淪胥憫多方之橫潰櫛風沐雨跋  
履山川推食解衣招徠將士將回轡而北指用推轂以

先驅但臣筋力已疲智謀何有周旋一壑已慚祖逖起舞之言顧視四方安取元龍上床之意敢不作興士氣申固疆圉陳力不能雖精神之未効見危致命尚宿志之猶存

車駕幸建康府李綱起居表臣某言伏覩都進奏院報車駕以二月二十七日進發臨幸建康府者乾旋坤轉共知天意之回雷動風行頓覺皇威之暢御六龍以于邁屯萬乘以要區三靈懽忻四海呼舞中賀竊以江左

之形勢莫如建鄴之雄渾自昔稱帝王之州於今為東  
南之會控引淮海襟帶江湖豈惟民物之阜蕃寔乃舟  
車之輻湊玉麟神璽晉以中興虎踞龍盤吳資用武兵  
戎之後王氣方隆皇帝陛下慨國步之多艱憫帝都之  
未復因茲天險濟以人謀高祖之固關中戰必勝而攻  
必取光武之保河內利則伸而鈍則蟠赤縣神州行遂  
定都於河洛靈州沃野聊茲臨幸於江山方將張皇六  
師震疊中土駕馭貔虎翦屠鯨鯢掃陵寢之氛埃葺宗

廟之鐘虞恢復故境再臻太平而臣誤被宸恩濫當閭  
寄雖長堤新廩竊慕於韋丹顧重鎮上流有慙於溫嶠  
心馳魏闕莫參鴛鴦之行地近日畿益傾葵藿之志

大駕駐蹕建康府綦宗禮起居表地鍾王氣兆夙見於  
前朝名協藩封祥寔開於上聖仰鑒輿之再駕知寰宇  
之將同中謝恭惟皇帝陛下德邁宣光孝如舜禹勵枕  
戈之志勤萬乘以親行均挾纊之恩撫六師而爭奮遂  
臨江次以定域中神靈所扶夷夏咸聳臣昔從清蹕叨

侍禁墀夢越秦淮已遠同朝之侶功成京邑庶陪復會  
之期

葉夢得到任謝表分東道之封圻再臨江國守北門之  
管鑰密護宸居任非所堪辭不獲命臣某中謝伏念臣  
去違軒陛俯仰十年退伏丘園棲遲一壑念多壘尚艱  
則懷捐軀盡瘁之義思大恩未報則有畢念靡它之言  
敢擇所安自求遠屏喟年齡之浸晚迫疾恙之交攻惟  
聖主曲亮此心故愚臣得安其分豈期人之復誤詔除

力殫懇款之誠莫動高明之聽勉交印綬寔愧吏民茲  
盖伏遇皇帝陛下惠顧臣鄰憂勤土宇撫萬邦巡侯甸  
何止臨踐土之宮會諸侯選車徒是將復東都之業責  
其來效付以舊邦斗運天旋已振荆吳之勝槩風驅電  
掃行銷河岱之妖氛但臣陳力不能強顏何補欽承威  
旨暫假歲時疆場無虞倘苟逃於譴累冕旒甚邇尚終  
異於慈憐

謝奏陳金人退敗降詔獎諭表正王者之兵既張天討

申輿人之誦少達下情仰荷眷慈特膺殊獎臣某中謝  
伏念臣少而不武老益無能當長江禦侮之衝適敵人  
敗盟之際惟紂臣有億萬衆皆倒戈攻後之徒而楚惡  
已數十年亦曷喪偕亡之曰戎車既駕我武惟揚敵所  
懾以爭先首摧虎焰取彼殘而共殄卒掃妖氛慙無矢  
石之勤濫竊璽書之賜敢懷掠美輒奏罔功茲蓋伏遇  
皇帝陛下謀發自中威行無外不震不動圖維每盡於  
敵情能弱能強終始弗逃於聖算欲勵服勞之士故捐

假寵之榮臣方以病衰懇祈退免堯言爭誦雖莫酬君父不貲之恩漢史紬書猶足貽子孫無窮之寶

謝軍寨遺欠放罪表奉職不虔自貽曠敗撫躬引咎方俟譴訶仰荷寬慈曲從貸釋中謝伏念臣素無遠用本寔凡材沈迷簿領之間徒勞無補出入兵戈之際愈久益踈誤竊守符仍司留鑰既不能折衝強敵少盡力於疆陞又無以和輯疲民使安生於閭里致令非意固戒不虞知重廢於官常敢倖逃於吏議茲盖伏遇皇帝陞



下謹微接下以德行仁雖愛憫黎元如御朽索之馬而保全臣子每漏吞舟之魚念將迫於終更俾不污於後累臣敢不勉殫衰懦深務省循豈不懷歸未遂乞身之請退思補過終慙報國之心

辭免資政殿大學士竊惟幸不可數常情所畏老而戒得前訓甚明非至愚迷孰不知警而況身忝近臣職當劇任方陛下信賞勸功之日而羣臣忘身為國之時此而不思曷逃大戾伏念臣出入侍從殆涉三紀中間坐

閒幾過其半固未嘗有一言一事見稱於世可報廩食之責而榮名厚祿每以冒居退自省量常若芒刺在已今者待罪近藩甫踰二年雖簿書米鹽躬督僚吏夙夜盡瘁乃其職事所當為至於陛下愛恤疲民欲其蕃庶整齊軍旅欲其安強則無毫髮之效而進官未幾加職繼下况資政殿設大學士真宗皇帝特創以為近弼非常之寵累朝不輕與人臣獨何心乃敢貪取欲望聖慈察其危情出於懇迫不敢但同常禮屢勤詔旨許令特

賜罷免使臣垂白之年粗免清議得竊知恥止足之名  
陛下所賜已多雖一日九遷何以復加

謝資政殿大學士表一字之褒仰勤明訓十旬之內再  
沐誤恩懇辭莫効於精誠祇命惟增於戰慄中謝伏念  
臣逢時過幸受寵居多積丘山未報之私無毫髮可論  
之效豈不曰知難而退悼此志之未伸固嘗懷見義必  
為曾餘生之何有矧茲黠寇方正嚴誅驅太原北伐之  
師雖即期於殄滅保洛邑東郊之衆可無待於撫綏自

省何勞能當異數茲蓋伏遇皇帝陛下矜存舊物駕御羣材視臣隣如股肱蓋欲奔趨而承事以爵祿為砥石又將磨厲以勸功重假衰殘申加獎飾佩景德升班之意敢陪近弼之殊榮追修文創始之名尤愧諸儒之極選雖期隕首莫稱所天

辭免觀文殿學士仍再任臣今月某日準御前金字牌降到尚書省劄子一道伏奉聖恩除臣觀文殿學士令再任者聞命震驚罔知攸措伏念臣衰病餘生昨者誤

蒙聖知起之間廢付以一面雖夙夜罄竭疲驚自知無以報稱故頻年屢干天聽乞從罷免仰荷眷私未即報可遷延已及終更方跼蹐以俟俞旨忽聞有此除授退量已試之效寔無秋毫小補豈敢重愧軍民輒懷貪冒兼觀文殿學士職名祖宗故事藩鎮外除無幾臣獨何人可當異數伏望天高聽卑俯察微懇特賜寢罷新命檢會臣前後累奏除一外任宮觀差遣

謝觀文殿學士表恩非所稱難逃負乘之譏命出非常

莫獲循牆之避重勤訓飭倍極兢危臣某中謝竊惟學士建名雖興前代近臣分職蓋始本朝至於易文明顧問之稱冠秘殿寵褒之盛仰觀故事尤號殊榮爰歷艱難蓋多勲德以舊臣宣勞於外固不乏人由建炎越次而除則無前比乃如固陋其敢叨逾茲蓋伏遇皇帝陛下義篤臣鄰憂深中外謂與之名者將求其實而使之禮者必報其忠故於賢賢蒐選之間每有下下并包之意重念臣受材至薄涉世多艱少日量能尚有滿盈之

戒暮年多取豈無顛覆之憂雖願竭於餘生恐終辜於  
大造

謝再任表三載黜幽方懼干於明憲再命而偃忽荐被  
於異恩不稱所蒙重慙非據臣某中謝伏念臣早由疎  
賤誤竊寵榮先朝濫竇於從班本無報效陛下擢登於  
政路已迫衰殘自知陳力之無堪唯有乞身而退屏逮  
謀帥聞仍玷留都故連年雖幸於苟安而無歲不祈於  
罷免仰蒙金貨偶及終更惟鰥鼠五技之既窮亦駕馬

十駕之何及豈期過聽更責後圖茲蓋伏遇皇帝陛下  
體貌羣工作興庶政念其拳拳忠款初非有愛於餘生  
察其齷齪廉勤猶未遽罹於大過姑令代匱豈曰因能  
丁寧殆至於再三感勵難酬於萬一臣敢不欽承德意  
勉激愚衷苟子產見推晚或容於鄭俗雖廉頗已老終  
無憾於趙人

賀大朝會表宸心抑畏曠盛典而弗居羣議載揚幸戎  
兵之始間是為周禮豈惟漢儀臣某中謝恭惟皇帝陛下



下基命昊天紹休文祖惟聰明睿知而不殺故能服天下無所用威既艱難險阻之備嘗則必履帝位以大居正路車在列鐘虞畢陳湛露惟晞共仰朝陽之盛橫流式遏敢忘巨海之歸臣假守外藩獲逢熙事五侯奉幣濫居邦甸之先萬壽稱觴莫預公王之末

葉適到任謝表內參從索之業外付師垣之重蓋人以為寵而臣之所憂中謝伏以行宮蒙高宗臨御之頻建鄴為六朝都邑之舊感時雖遠撫事尚存義報仇讎安

得不居今而思古慮先根本則豈容忘實而徇名藩牆  
初銳於掃除堂奧遽煩於備警江流迴繞遂將數里而  
屯民力空殫必也計丁而役募市人至萬數開水艦且  
千餘欲以歲年之規責於旬月之近自憐憂患復苦病  
昏忽被趣行罔知攸措此蓋伏遇皇帝陛下文訓武克  
天施地生觀衣袂濡曳之爰所宜戒懼誦桑土綢繆之  
句尤在恩勤臣敢不怵惕以預防拊循而夙具視身衰  
謝已無欲速之心憑國威靈願附不爭之勝

趙葵到任謝表臣葵言恭準四月十八日制可授臣樞  
密使兼參知政事督視江淮京西湖北軍馬續準御筆  
兼知建康府行宮留守江東安撫使尋具辭免三省司  
奉御筆不允不得更有陳請臣已於五月二十六日就  
鎮江府交割江東安撫使職事今來又於六月初九日  
到建康府交割建康府行宮留守司職事管幹訖者濫  
陪兵柄何裨立武之功峻陟使權乃冒視師之任申明  
兼司於筦鑰誤恩仍被於絲綸疊是龍光凜然蚊負茲

飲水而就道已涓日而臨戎中謝竊惟帷幄任顯既出  
膺於隆委宮府體一斯克應於危機未有脉絡不貫而  
忠可輸未有心德不孚而事可集嘗觀往轍徒抱壯懷  
雖當獎率三軍之秋莫展經營四國之志兵事盡付節  
度寧免拘攣明主可為忠言尚存形迹繫欲乞寬於憂  
顧允惟信任而責成如臣者多病早衰至愚極陋夙嘗  
艱險僅逃乏絕之譏晚被簡知深積僥踰之懼憂時之  
髮已白體國之心尚丹典樞要則無運動之精神翊政

機則茂贊襄之智略素餐尸位人謂如斯為斲汗顏技  
止此爾比籲天而漑悃謂指日以投閒宥密高聯倏拜  
超遷之渥丕寧垣制趣為督護之行勉之以不從中御  
之詞繼之以汝擇自從之訓聖恩天大臣想淵臨果曷  
稱於倚毗但莫勝於隕越茲蓋恭遇皇帝陛下乾坤覆  
育日月照臨明目達聰廣虞舜知人之哲謹微接下懋  
宣王復古之勛俾申飭於師干庸布昭於聖武凡叨任  
使疇不激昂臣敢不仰體宸心俯殫臣節鞠躬盡力所

當無歉於前脩禦侮折衝尚覲少收於後效

趙葵辭免轉官表臣葵言伏蒙聖恩以臣視師暮年特轉三官依前樞密使兼參知政事督視江淮京西湖北軍馬兼知建康府江東安撫使行宮留守仍加恩尋具辭免特降詔書不允者囊封飛奏懇還褒賞之榮鑾禁出綸曲示訓辭之寵冀乞收於誤渥庸疊冒於聰聞中謝臣曩稟廟謨出提師律謹守平平之策曾無赫赫之名受任暮年技已窮而宜去祈閒累疏言雖切而弗俞

爰仰體於眷留用復祇於戍役尚虞綿力莫濟後艱至  
若計官資之崇卑較邑封之多少臣之素志寔匪敢知  
夫何誕布於恩徽抑且申嘉於戎捷邊城郤敵蓋將士  
之勤勞淮水安流本朝廷之威德而臣下掠衆美上冒  
洪私倘復昧於牢辭將重干于大戾伏望皇帝陛下執  
馭臣之轡策謹在笥之衣裳念臣忝備端樞於寵榮而  
已極察臣偶無關事乃職分之當為毋拘反汗之嫌俯  
狗由衷之請俾仍舊秩用穆僉言所有恩命臣未敢祇

受臣無任瞻天望聖激切屏營之至

馬光祖到任謝表臣光祖言伏奉告命除臣江淮制置  
大使知建康府兼江東安撫使臣除已於四月初三日  
到任交割職事望闕遙謝祇受訖者荊州授代祈返故  
廬書殿陞班還畀舊鎮大恩天造危涕雨零已延見於  
吏民如歸對其子弟謂臣去畀之後纔及一年訝臣守  
邊北來老已數倍臣具宣德意咸得歡心中謝載念臣  
蒙被簡知當加鞭辟雖一日欲辦一日之事毋敢惰容



然三邊自有三邊之才終慚本色曩風濤之震撼每雨露之涵濡既全孤蹤復誤殊渥恩言嘉獎豈憚再三溫旨慰存非止一二臣際逢明聖殊異尋常他無稱塞之方惟竭馳驅之力深惟閫事尤切江防綢繆牖戶之當先綿絡舟船之當急兵當使練民當使安昔素幸其相孚今仍持於不擾嘗以重來之意揭諸四達之衢上昭皇仁下盡臣職茲蓋恭遇皇帝陛下文武並用功德兼隆朝夕憂勤至損玉食時幾謹勅思保金甌厚司馬法

之賞以激士心輟奉宸庫之財以濟國用爰重陪都之  
寄濫叨易地之除臣敢不體奎畫之下賁於風采而振  
飭忠信以事其上直可通天死生不入於心惟知報國  
臣無任感天荷聖激切屏營之至

馬光祖謝賜大使印表麟符改畀增重使名龜印肇頒  
有辜恩命矩陰陽而辦器爐天地以成功八字昭垂百  
神參護中謝伏念臣身叨授鉞才匪攻金砥礪孤忠不  
移水火之性銷磨萬事猶存鐵石之心奉綈詔以重來

愧鉛刀之再割爰趣有司之刻式隆外閭之權森玉筋以分明儼金窠而妥帖江山精采壁壘輝煌茲蓋恭遇皇帝陛下同符三皇作信萬國公侯封而論賞曾無利敝之私覈治效以賜書具嚴勉勵之意用廣陶鎔之造俾膺壘若之榮臣敢不奉以欽行守而勿墜恐威稜寢減望風之解綬之人逮邊鄙康寧即日上歸田之疏馬光祖謝授資政殿大學士表上公制勝賞及濟師遽殿陞班任仍專閫所謂因人而成事是為不稼而取禾

牢辭弗俞冒受知愧中謝臣竊觀大學士之選間寵舊  
輔臣之尊祥符賜敏中之詩參以兩制康定如梁適之  
請止於二員凡特冠于隆名盖有資於庶政我祖宗所  
不輕授故臣子以為至榮矧管鑰之寄要在當仁而鉛  
刀之材已試弗績乃頒誤渥更廁黃扉伏念臣本乏異  
能過叨繁使屬蟻蜂之巢聚上貽當宁之憂率貔虎以  
徂征外稟宣威之令賴武絲之密運致晷緯之森明皆  
謝安授將之功皆裴度董師之力於臣何有敢意此除

茲蓋恭遇皇帝陛下剛健時行武文天運謂朝廷之名  
器不以假人謂軍國之紀綱先乎信賞知臣雖無可用  
之寔察臣粗守不欺之忠爰錫衮褒聊示甄別臣敢不  
誓酬獎拔徒恨衰頽臄技已窮况復過飲河之量駕材  
既頃恐難妨歷塊之良

馬光祖謝授觀文殿學士表它職留臺慙無寸效通班  
書殿序進一階儼分野之不移赫觀瞻之自改中謝眷  
延恩之邃幄本集瑞之祕庭夷考先朝以待舊輔臣之

禮亦有宰揆未加大學士之名至於外臣之叨際蓋亦歷年而間見允為異數顧可冒居乃若臣愚濫承人之少仕州縣但服勞於期會之間晚際聖明遂許國以馳驅之事克恭朝夕惟命東西誦諸葛討賊之詞慨然太息慕充國請行之勇疑是前生雖兩閩之間粗免踈虞然三軍之事竟非習熟而况老將知而耄及食既少而事煩歲月暮遲病疾縈絆臣為此懼將削牘以祈閒帝矜其愚又加恩而因任循牆無計望闕知歸茲蓋伏遇

皇帝陛下聖策有功常德立武謹微接下聿嘉庭燎之  
規復古會侯克振車攻之業致令冗散獲與調劑臣惟  
有寤寐鐵衣摩娑石鼓觀人文以化天下雖莫輔於緝  
熙錫王命以在師中尚力全於征吉

--	--	--	--	--	--	--	--



欽定四庫全書

景定建康志卷三十七

宋 周應合 撰

文籍志五

詩章

此卷不能盡者各載於諸志所為作之下

陶潛初為劉裕參軍曰賦詩

臧榮緒晉書曰宋武帝行鎮軍將軍沈約宋書曰陶

潛字淵明潯陽人少有高趣為鎮軍參軍後為彭澤令解印綬去職

弱齡寄事外委懷在

琴書被褐欣自得屢空常晏如時來苟宜會宛轡憇通

衢投策命晨旅暫與園田踈渺渺孤舟逝縣縣歸思紆

我行豈不遙登降千里餘目倦脩塗異心念山澤居望

雲慙高鳥臨水愧遊魚真想初在襟誰謂形迹拘聊且

憑化遷終反班生廬

淵明初為參軍時已察事變志於遯世矣

辛丑歲七

月赴假夜行塗口詩

沈約宋書曰潛自以曾祖晉世宰輔不復屈身後代自宋祖王業漸

隆不復肯仕所著文章皆題年月義熙以前者則書晉氏年號永初以來唯云甲子而已閒居三十

載遂與塵事冥詩書敦宿好林園無世情如何舍此去

遙遙至西荆叩棧親秋月臨流別友生涼風起將夕夜

景湛虛明昭昭天宇闊晶晶川上平懷役不遑寐中宵

尚孤征商歌非吾事依依在耦耕投冠旋舊墟不為好  
爵榮養真衡茅下庶以善自名 金陵阻風雪書寄楊

江寧

一作新林浦  
阻風寄友人

潮水定可信大風難與期清晨西北

轉薄暮東南吹以此難挂席洄沿頗淹遲使索金陵書

又叨賢宰知絃歌止過客惠化聞京師海月破團景旅

將生淥池昨日北苑花初開未滿枝今看白門柳夾道

垂青絲歲物忽如此我來復幾時紛紛江上雪草草客

中悲明發板橋浦空吟謝朓詩

此係李  
太白詩

謝朓作鼓吹曲江南佳麗地金陵帝王州迤邐帶綠水  
迢遞起朱樓飛甍夾馳道垂楊蔭御溝凝笳翼高蓋疊  
鼓送華輶獻納雲臺表功名良可收 遊東田詩

朓有莊在

鍾山東遊還作

慙慙苦無悰攜手共行樂尋雲陟累榭隨山望

菌閣遠樹暖芊芊生煙紛漠漠魚戲新荷動鳥散餘花  
落不對芳春酒還望青山郭

高蟾金陵晚望詩曾作浮雲歸晚翠猶陪落日汎秋聲  
世間無限丹青手一片傷心畫不成

司空文明金陵懷古詩輦路江楓暗宮潮野草春傷心  
庾開府老作北朝臣

顏延之作釋奠詩

文帝元嘉二十年三月皇太子劬國  
釋奠於國學延年奉詔而作詩

尚師位家崇儒門稟道毓德講藝立言浚明爽曙達義  
茲昏永瞻先覺顧惟後昆大人長物繼天接聖時屯必  
亨運蒙則正偃閑武術闡揚文令庶士傾風萬流仰鏡  
虞庠飾館睿圖炳晬懷仁憬集挹智廩至踵門陳書躡  
蹻獻器澡身玄淵宅心道秘伊昔周儲聿光往記思皇

世拓體元作嗣資此夙知降從經志遏彼前文規周矩  
植正殿虛筵司分簡日尚席函丈丞疑奉帙侍言稱辭  
惇史秉筆妙識幾音王載有述肆議芳訊大教克明敬  
躬祀典告奠聖靈禮屬觀盥樂薦歌笙昭事是肅俎寔  
非馨獻終襲吉即宮廣燕堂設象筵庭宿金懸台保兼  
徽皇戚比彥肴乾酒澄端服整弁六官眡命九賓相儀  
纓笏匝序巾卷充街都莊雲動野馗風馳倫周伍漢超  
哉邈猗清暉在天容光必照物任其情理宣其奧妄先

國曹側聞邦教徒愧微冥終謝智効

沈約登鍾山作靈山紀地德地險資嶽靈終南表秦觀  
少室邇王城翠鳳翔淮海衿帶繞神垆北阜何其峻林  
薄杳葱青發地多奇嶺干雲非一狀合沓共隱天參差  
互相望鬱律構丹巘峻嶒起青嶂勢隨九疑高氣與三  
山壯即事既多美臨眺殊復奇南瞻儲胥觀西望昆明  
池山口咸可悅賞逐四時移春光發隴首秋風生桂枝  
多值息心侶結架山之足八解鳴澗流四禪隱巖曲窈

冥終不見蕭條無可欲所願從之遊寸心於此足君王  
挺逸趣羽旆臨崇基白雲隨玉趾青霞雜桂旗淹留訪  
五藥顧步佇三芝于焉仰鑣駕歲暮以為期

李白金陵歌送別范宣石頭巉巖如虎踞凌波欲過滄  
江去鍾山龍盤走勢來秀色橫分歷陽樹四十餘帝三  
百秋功名事跡隨東流白馬小兒誰家子泰清之歲來  
關囚一作白馬金鞍誰家子吹脣虎嘯鳳凰樓金陵昔時何壯哉席卷英豪  
天下來冠蓋散為烟霧盡金輿玉座成寒灰扣劍悲吟



空咄嗟梁陳白骨亂如麻天子龍沈景陽井誰歌玉樹

後庭花此地傷心不能道目下離離長青草送爾長江

萬里心他年來訪商山皓金陵三首晉室一作南渡家

日此地舊長安地即帝王宅山為龍虎盤金陵空壯觀

天塹一作江寒淨波瀾醉落回橈去吳歌且自歡一作誰云行路難

又地擁金陵勢城迴江一作漢水流當時百萬戶夾道起

朱樓亡國生春草離宮沒古丘空餘後湖月波上對滄

洲一作瀛洲又六代興亡國三杯為爾歌苑方秦地少一作小

山似洛陽多古殿吳花草深宮晉綺羅並隨人事滅東

逝與

一作祇

滄波

登梅崗望金陵贈族姪高座寺僧中

享鍾山抱金陵霸氣昔騰發天開帝王居海日照宮闕  
羣峰如逐鹿奔走相馳突江水九道來雲端遙明沒時  
遷大運去龍虎勢休歇我來屬天清登覽窮楚越吾宗  
挺禪伯特秀鸞鳳骨衆星羅青天明者獨有月冥居順  
生理草木不翦伐煙牕引薔薇石壁老野蕨吳風謝安  
履白足傲履屨幾宿一下山蕭然忘干謁談經演金偈

降鶴舞海雪時聞天香來了與世事絕佳遊不可得春  
風惜遠別賦詩留巖屏千載庶不滅 贈昇州王使君

忠臣六代帝王國三吳佳麗城賢人當重寄天子借高  
名巨海一邊靜長江萬里清應須救趙策未許棄侯羸

別金陵諸公海水昔飛動三龍紛戰爭鍾山危波瀾傾

側駭奔鯨黃旗一掃蕩割壤開吳京六代更霸主遺跡

見都城

一作遺都  
見空城

至今秦淮間禮樂秀羣英地扇鄒魯

學詩騰顏謝名五月金陵西祖余白下亭欲尋廬峰頂

先繞漢水行香爐紫烟滅瀑布落太清若攀星辰去揮  
手緬含情 金陵汴流玩月達天門因寄句容主簿滄  
江汴流歸白壁見秋月秋月照白壁皓如山陰雪幽人  
停宵征賈客忘早發進帆天門山迴首牛渚沒川長信  
風來日出宿霧歇故人在咫尺新賞成胡越寄君青蘭  
花惠好底不絕 遊金陵贈同旅朝登北湖亭遙望瓦  
屋山天清白露下始覺秋風還遊子託主人仰觀眉睫  
間日一作目色送飛鴻邈然不可攀長吁相勸勉何事來

吳關聞有貞義女振窮漂水灣清光了在目

一作眼

白日

如披顏高墳五六墩萃兀栖猛虎遺跡翳九泉芳名動

千古子胥昔乞食此女傾壺漿運開展宿憤入楚鞭平

王凜烈天地間聞名若懷霜壯夫或未達十步九太行

與君拂衣去萬里同翱翔金陵聽韓侍御吹笛韓公

吹玉笛侑儻流英音風吹繞鍾山萬壑皆龍吟王子停

鳳管師襄掩瑤琴餘響渡江去天涯安可尋春日陪

楊江寧宴感古作昔聞顏光祿攀龍宴京湖樓船入天

鏡帳殿開雲衛君王歌大風如樂豐沛都延年獻嘉作  
邈與詩人俱我來不及此獨立鍾山孤楊宰穆清颺芳  
聲騰海隅英寮滿四座燦若瓊林敷鷁首弄倒景蛾眉  
綴明珠新絃採梨園古舞嬌吳歆曲度繞雲漢聽者皆  
歡娛難棲何嘈嘈汾月沸笙竽古之帝宮苑今乃人樵

蘇感此勸一觴願君覆瓢壺榮盛一作盛時當作樂無今後

賢吁

金陵江上遇蓬池隱者

時於落星石上以紫綺裘換酒為歡心愛

名山遊身隨名山遠羅浮麻姑臺此去或未返遇君蓬

池隱就我石上飯空言不成歡強笑惜日晚綠水向鴈  
門黃雲蔽龍山歎息兩客者徘徊吳越間共語一執手  
留連夜將久解我紫綺裘且換金陵酒酒來笑復歌興  
酣樂事多水影弄月色清光奈愁何明晨掛帆席離恨  
滿滄波金陵城西樓月下吟金陵夜寂涼風發獨上  
西樓望吳越白雲映水搖空城白露如珠滴秋月月下  
長吟久不歸古今相接眼中稀解道澄江靜如練令人  
却憶謝元暉月夜金陵懷古蒼蒼金陵月空懸帝王

州天文列宿在霸業大江流綠水絕馳道青松摧古丘  
臺傾鳩鵲觀宮沒鳳凰樓別殿悲清暑芳園罷樂遊一  
聞歌玉樹蕭颺後庭秋 戲贈鄭溧陽陶今日日醉不  
知五柳春素琴本無絃漉酒用葛巾清風北窻下自謂  
羲皇人何時到溧里一見平生親 贈溧陽宋少府陟  
李斯未相秦且逐東門兔宋王事襄王能為高唐賦常  
聞淶水曲忽此相逢遇瀟灑青天開豁然披雲霧歲歲  
紫鸞鳥巢在崑山樹驚風西北吹飛落南溟去早懷經



濟策特受龍顏顧白玉棲青蠅君臣忽行路人生感分  
義貴欲呈丹素何日清中原相期廓天步猛虎行朝  
作猛虎行暮作猛虎吟腸斷非關隴頭水淚下不為雍  
門琴旌旗繽紛兩河道戰鼓驚山欲傾倒秦人半作燕  
地囚胡馬翻銜洛陽草一輸一失關下兵朝降夕叛幽  
薊城巨鼇未斬海水動魚龍奔走安得寧頗似楚漢時  
翻覆無定止朝過博浪沙暮入淮陰市張良未遇韓信  
貧劉項存亡在兩臣暫到下邳受兵略來投漂母作主

人賢哲栖栖古如此今時亦棄青雲士有策不敢犯龍  
鱗竄身南國避胡塵寶書長劒掛高閣金鞍駿馬散故  
人昨日方為宣城客掣鈴交通二千石有時六博快壯  
心遶牀三匝呼一擲楚人每道張旭奇心藏風雲世莫  
知三吳邦伯皆顧盼四海雄俠相追隨蕭曹曾作沛中  
吏攀龍附鳳當有時漂陽酒樓三月春楊花茫茫愁殺  
人胡人一作胡雖綠眼吹玉笛吳歌白紵飛梁塵丈夫相見  
且為樂槌牛糲鼓會衆賓我從此去釣東海得魚笑寄

情相親

杜甫送許八拾遺歸江寧觀省

甫昔時嘗客遊此縣於許生處乞瓦棺寺維摩

圖樣志諸篇末

詔許辭中禁慈顏赴北堂聖朝新孝理祖席倍

輝光內帛擎偏重官衣著更香淮陰新夜驛京口渡江  
航春隔難人晝秋期燕子涼賜書誇父老壽酒樂城隍  
看畫曾飢渴追蹤恨渺茫虎頭金粟影神妙獨難忘

韋莊金陵圖江雨霏霏江草齊六朝如夢鳥空啼無情  
最是臺城柳依舊烟籠十里堤

劉禹錫金陵懷古王濬樓船下益州金陵王氣黯然收  
千尋鐵鎖沈江底一片降幡出石頭人世幾回傷往事  
山形依舊枕寒流而今四海為家日故壘蕭蕭蘆荻秋  
沈彬金陵雜題王氣生秦四百年晉元東渡浪花船正  
慙海內皆塗地來保江南一片天古樹著行臨遠岸暮  
山相亞出微烟千征萬戰英雄盡落日牛羊食野田  
暮潮聲落草光沈賈客來帆宿岸陰一笛月明何處酒  
滿城秋色幾家砧時清曾惡桓溫盛山翠長牽謝傳心

今日到來何物在碧烟和雨鏢寒林  
再過金陵玉樹歌終王氣收鴈行高送石頭秋  
江山不管興亡事一任斜陽伴客愁

王貞白金陵懷古恃險不種德興亡歎數窮  
石城幾換主天塹謾連空御路疊成塚臺基聚牧童  
折碑猶有字多紀晉英雄又六代江山在繁華古帝都  
亂來城不守戰後地多蕪寒日隨潮落歸帆與鳥孤  
興亡多少事回首一長吁

杜牧金陵始發碧江口曠然諧遠心風清舟在鑑日落  
水浮金瓜步逢潮信臺城過雁音故鄉何處是雲外即  
喬林

羅隱過江寧縣前水色細鱗鱗一為夫君弔水濱漫把  
文章矜後代可知榮貴是他人罵偷舊韻還成曲草賴  
餘吟盡解春我亦有心無處說等閒停棹似迷津夜  
泊金陵冷烟輕澹傍衰叢此夕秦淮駐斷蓬栖雁遠驚  
沽酒火亂鷗高避落帆風地銷王氣波聲急山帶秋陰

樹影空六代精靈人不見思量應在月明中 又玉樹  
歌聲澤國春纍纍輜重憶亡陳垂衣端拱渾閒事忍把  
江山乞與人 又潮平遠岸草侵沙東晉衰來最可嗟  
庾舅已能窺帝室王郎還是預人家山寒老樹啼風曲  
泉暖枯荻動芷芽欲起九原看一遍秦淮聲急日西斜  
李羣玉秣陵懷古野花黃葉舊吳宮六代豪華燭散風  
龍虎勢衰佳氣歇鳳凰名在故臺空市朝遷變秋蕪綠  
墳壠高低落照紅霸業鼎圖人去盡獨來惆悵水雲中

崔塗金陵懷古葦聲蕭颯水天秋吟對金陵古渡頭千  
載是非輸蝶夢一樽風雨屬漁舟若無仙分應須老幸  
有山歸即合休何必登臨更惆悵本來身世只如浮  
唐堯臣金陵懷古晉末英雄起神器淪荒服胡月蝕中  
原白日升暘谷金陵寔形勝關山固重複巨壑隍北壩  
長江塹西隩鑿山擬嵩華穿地象伊穀草昧席羅圖華  
路戴黃屋一時因地險五世享天祿禮樂何煌煌文章  
紛郁郁多士春林秀作頌清風穆出入三百年朝事幾



翻覆攙搶如雲勃鯨鯢旋自曝倦聞金鼎移驟覩靈龜  
卜吁嗟王氣盡坐悲天運候天道何茫茫善淫乃相復  
行路偏衣半遂亡大梁族日隱汀洲上舳艫登川陸月  
迴吳山樹風聞楚江鵠因依蘭蕙叢採蘋不盈掬

皮日休金陵道中酬茅山廣文南陽博士寒嵐依約認  
華陽遙憶高人臥草堂半日始齋青餽飯移時空印白  
檀香鶴雛入夜歸雲屋乳管逢春落石床誰道夫君無  
伴侶不離窓下見羲皇 住在華陽第八天望君唯欲

結良緣堂局洞裏千秋燕  
厨蓋巖根數井泉壇上古松  
疑度世觀中幽鳥恐成仙  
不知何事迎新歲烏納裘中  
一覺眠  
五色香烟惹內文  
石飴初熟酒微醺  
將開丹竈那妨鶴欲算  
碁圖却望雲海氣  
半生當洞見瀑冰初  
坼隔山聞如何  
世外無交者一臥金壇祇有君

孟郊溧陽秋霽晚雨曉猶在  
蕭寥激前階星星滿衰鬢  
耿耿入秋懷舊識半零落  
前心驟相乖飽泉亦恐醉  
惕宦肅如齋上客處華地下  
寮宅枯崖叩高占生物齟齬

固難諧 溧陽唐興寺觀薔薇花忽驚紅琉璃千艷萬

艷開佛火不燒物淨

一本作靜

香空徘徊花下印文字林間

詠觴杯羣官餞宰官此地車馬來

許渾贈茅山高拾遺諫獵歸來綺季歌大茅峰影薄秋

波山齋留客掃紅葉野艇送僧披綠莎長覆舊圖碁勢

盡遍添新品藥名多雲中黃鵠日千里自宿自飛無網

羅

李德裕陪金陵府相中堂夜宴滿耳笙歌滿眼花滿樓

珠翠勝吳娃因知海上神仙窟只似人間富貴家繡戶  
夜攢紅燭市舞衣晴曳碧天霞聲愁夜半青娥散揚子  
江頭月未斜 寄茅山孫尊師何地最翛然華陽第八  
天松風清有露蘿月靜無煙乍警瑤壇鶴時嘶玉樹蟬  
欲馳千里戀唯有鳳門泉 石上溪蓀發紫茸碧山幽藹  
水溶溶菖花定是無人見春日唯應羽客逢 獨尋蘭  
渚翫馳暉閒倚松窓望翠微遙想春山明月曉玉壇清  
磬步虛歸

崔顥詠江畔老人怨江南年少十八九乘舟欲渡青溪  
口青溪口邊一老翁鬢眉皓白已衰朽自言家代仕梁  
陳垂朱拖紫三十人兩朝出將復入相五世疊起乘朱  
輪父兄三葉皆尚主子女四代為妃嬪南山賜田接御  
苑北宮甲第連紫宸直言榮華未休歇不覺山崩海將  
竭兵戈亂入建康城烟火連燒未央闕衣冠士子陷鋒  
刃良將名臣盡埋沒山川改易失市朝衢路縱橫填白  
骨老人此時尚少年脫身走得投海邊罷兵歲餘未敢

出去鄉三載方來旋蓬蒿忘却五城宅草木不識青谿  
田雖然得歸到鄉土零丁貧賤長辛苦採樵屢入溧陽  
山川稻常過新林浦少年欲知老人歲豈知今年一百  
五君今少壯我已衰我昔少年君不覩人生貴賤各有  
時莫見羸老相輕欺感君相問為君說說罷不覺令人  
悲

孫逖雜言丹陽行詩丹陽古郡洞庭陰落日扁舟此路  
尋傳是東南舊都處金陵中斷碧江深在昔風塵起京

都亂如燬雙關戎虜間千門戰場裏傳聞一馬化為龍  
南渡衣冠亦願從石頭橫帝里京口拒戎鋒青楓林下  
迴天蹕杜若洲前轉國容都門不見河陽樹輦道唯聞  
建業鐘中原悠悠幾千里欲掃撓槍未云已英雄傾奪  
何紛然一盛一衰如逝川可憐宮觀重江裏金鏡相傳  
三百年自從龍見聖人出六合車書混為一昔年王氣  
今何在併向長安就堯日荆榛古木閒荒阡共道繁華  
不復全赤縣餘存江樹月黃圖半入海人煙暮來山川

登臨遍覽古愁吟  
淚如霰唯有空城多白雲  
春風淡蕩無人見

許渾金陵懷古玉樹歌殘

一作愁

王氣終景陽兵合

一作盡

戍樓空松

一作梧

楸遠近千官塚  
禾黍高低六代宮  
石燕

拂雲晴亦雨  
江豚吹浪夜還風  
英雄一去豪華盡  
惟有

青山似洛中

秋月寄茅山高拾遺  
一笛迎風黃葉飛

強携刀筆換荷衣  
潮寒水國秋砧早  
月暗山城夜漏稀

巖響遠聞樵客過  
浦深遙送釣童歸  
中年未識從軍樂



虛近三茅望少微 茅山贈梁尊師雲屋何年客青山  
白日長種花春掃雪看籙夜焚香上象壺中濶平生夢  
裏忙幸承仙籍後乞取大還方 遊茅山步步入山門  
仙家鳥徑分漁樵不到處麋鹿自成羣石面迸出水松  
頭穿破雲道人星月下相次禮茅君

李司徒建勲闕下偶書寄孫員外長安驅馳地貴賤共  
悠悠白日誰相促勞生自不休鳳翔雙闕曉蟬噪六街  
秋獨有南宮客時來話釣舟 離闕下日感恩二年塵

冒處中台喜得南歸退不才即路敢期皇子送出關猶  
有御書來未知天地恩何報翻對江山思莫開斜日葦  
汀凝立處遠波微颺翠如苔

王安石和王微之重感南唐事叔寶傾陳衍弊梁可嗟  
曾不見興亡齋祠父子終身費酣詠君臣舉國荒南狩  
皖山非故地北師淮水失名王天移四海歸真主誰誘  
昏童肯用長 和金陵懷古懷鄉訪古事悠悠獨上江  
城滿目秋一鳥帶烟來別渚數帆和雨下歸舟蕭蕭暮

吹驚紅葉慘慘寒雲厭舊樓故國淒涼誰與問人心無  
復更風流 和陳輔金陵即事南郭先生比鷓鴣年年過  
我未愆期休論王謝當時事大抵烏衣祇舊時 和吳  
御史臨淮感事柵鐐城扉曉一開施牙車軸轉成雷黃  
塵欲礙龜山出白浪空分汴水來澄觀有材邀昧陋霽  
雲無力報奸回騷人此日追前事悲氣隨風動管灰

送吳龍圖知江寧才高明主睠方深屬郡聞風自革心  
閭里不須多按治山川從此數登臨茅簷坐隔雲千里

栢壘初抽翠一尋東望泣然知有寄但疑公豈久分襟  
贈上元宰白下有賢宰能詩如紫芝民欺自不忍縣  
治本無為風月誰同賞江山我亦思粉牆侵醉墨惆悵  
綠苔滋臺城寺側獨行春山撩亂水縱橫籬落荒畦  
草自生獨往獨來山下路筍輿看得綠陰成自金陵  
至丹陽道中有感數百年來王氣銷難將往事問漁樵  
苑方秦地皆蕪沒山借揚州更寂寥荒埭暗雞催月曉  
空場老雉挾春驕豪華只有諸陵在往往黃金出市朝

金陵絕句水際柴門一半開小橋分路入青苔背人

照影無窮柳隔屋吹香併是梅結綺臨春歌舞地荒

蹊狹巷

一云類城斷塹

兩三家東風漫漫吹桃李非復當時仗

外花懷古六代豪華空處所金陵王氣黯然收烟濃

草遠望不盡物換星移幾度秋畢竟江山誰是主却因

歌舞破除休我來不見當時事上盡重城更上樓出

金陵白石岡頭草木深春風相與散衣襟浮雲映郭留

佳氣飛鳥隨人作好音到金陵江湖歸不及花時空

遶扶疎綠玉枝夜直去年看蓓蕾晝眠今日對紛披

乞得膠膠擾擾身五湖烟水替風塵祇將鳬雁為同侶  
不與龜魚作主人 蔣山手種松青青石上歲寒枝一

寸巖前手自移聞道近來高數尺此身蒲柳故應衰

金陵懷古霸祖孤身取二江子孫多以百城降豪華盡  
出成功後逸樂安知與禍雙東府舊基留佛剎後庭餘  
唱落船窻黍離麥秀從來事且置興亡近酒缸 天兵  
南下此橋江敵國當時指顧降山水雄豪空復在君王

神武自難雙雷連落日頻回首想像餘墟獨倚窓却怪  
夏陽纔一葦漢家何事費罌缸地勢東回萬里江雲  
間天闕古來雙兵纏四海英雄得聖出中原次第降山  
水寂寥埋王氣風烟蕭颯滿僧窓廢陵壞塚空冠劍誰  
復沾纓酌一缸憶昨天兵下蜀江將軍談笑士爭降  
黃旗已盡年三百紫氣空收劍一雙破堞自生新草木  
廢宮誰識舊軒窓不須搔首尋遺事且倒花前白玉缸  
憶金陵覆舟山下龍光寺元武湖畔五龍堂想見舊

時遊歷處烟雲渺渺水茫茫 烟雲渺渺水茫茫繚繞  
蕪城一帶長蒿目黃塵憂世事追思塵迹故難忘 追  
思塵迹故難忘翠木蒼藤水一方聞說精廬今更好  
隨殘汴理歸艎 清明輦下懷金陵春陰天氣草如烟  
時有飛花舞道邊院落日長人寂寂池塘風慢鳥翩翩  
故園回首二千里新火傷心六七年青蓋皂衫無復禁  
可能乘興酒家眠 句容道中荒烟寒雨暮山重草木  
冥冥但有風二十四年三往返一身長在百憂中 遊



鍾山終日看山不厭山買山終待老山間山花落盡山  
長在山水空流山自閒 兩山松櫟暗朱藤一水中間  
勝武陵午梵隔雲知有寺夕陽歸去不逢僧 偶向松  
間覓舊題野人休誦北山移丈夫出處非無意猿鶴從  
來自不知 榮祿嗟何及明恩愧未酬欲尋西掖路更  
上北山頭 鍾山晚步小雨輕風落棟花細紅如雪點  
平沙槿籬竹屋江村路時見宜城賣酒家 懷鍾山投  
老歸來供奉班塵埃無復見鍾山何須更待黃梁熟始

覺人間是夢間 鍾山絕句澗水無聲遶竹流竹西花  
草弄春柔茅簷相對坐終日一鳥不鳴山更幽 竹窻  
紅莧兩三根山色遙供水際門只我近知墻下路能將  
屐齒記苔痕 望鍾山佇立望鍾山陽春更蕭瑟暮尋  
北郭歸故遶東岡出 憶鍾山蒼藤翠木江南山激激  
流水兩山間山高水深魚鳥樂車馬跡絕人長閒雲埋  
樵聲隔蔥蒨月弄釣影臨潺湲黃塵滿眼衣可濯夢寐  
惆悵何時還 思北山日日思北山而今北山去寄語

白蓮庵迎我青松路 北山暮歸示道人千山復萬山  
行路有無間花發蜂逋繞果垂猿對攀獨尋寒水渡欲  
趁夕陽還天黑月未上兒童初掩關 還家豈不樂生  
事未應閒朝日已復出征鞍方便攀傷心百道水闌目  
數重山何以忘羈旅脩然醉夢間 秣陵道中口占經  
世才難就田園路欲迷慙慙將白髮下馬照青溪 歲  
熟田家樂秋風客自悲茫茫曲城路歸馬日斜時 知  
金陵投老歸來一幅巾君恩猶許備藩臣芙蓉堂下疏

秋水且與龜魚作主人

蘇魏公頌詠天禧寺竹萬个碧琅玕兩旁蔭潭沼叢深  
蔽巖麓幹直露雲表剝影下交如山房上環繞昔嘗止  
鳴鳳今肯棲凡鳥笋抽龍種瘦籜墜孫枝小美勝會稽  
箭珍逾汶陽篠兔園名非奇渭川比終少樵刪草根變  
客玩茶烟繚創亭僧意高諭佛禪心了吾愛有霜竹一  
到忘昏曉暮春與諸同僚登鍾山望牛首清明天氣  
和江南春色濃風物正繁富邦人競遊從官曹幸多暇

交朋偶相逢並驅出東郊乘興遊北鍾陟險不蠟屐扶  
危靡搢筇上登道林祠俯觀辟支峰亂山次阡陌長江  
遶提封蕭條舊井邑茂盛新杉松攬物思浩然懷古心  
顯顯念昔全盛時茲山衆之宗天都對雙闕霸業基盤  
龍六朝遞興廢百祀居要衝人情屢改易世事紛交攻  
當時佳麗地一旦空遺踪惟有出岫雲古今無變容  
蘇東坡軾六月七日泊金陵阻風得鍾山泉公書寄詩  
為謝今日江頭天色惡礮車雲起風欲作獨望鍾山喚

寶公林間白塔如孤鶴寶公骨冷喚不聞却有老泉來  
喚人電眸虎齒霹靂舌為予吹散千峰雲南行萬里亦  
何事一酌曹谿知水味他年若畫蔣山圖為作泉公喚  
居士 同王勝之遊蔣山到郡席不暖居愁空惘然好  
山無十里遺恨恐他年欲款南朝寺同登北郭船朱門  
收畫戟紺宇出青蓮夾路蒼髯古迎人翠麓偏龍腰蟠  
故國鳥爪寄層巔竹杪飛華屋松根泣細泉峰多巧障  
日江遠欲浮天略約橫秋水浮屠插暮烟歸來踏人影

雲細月娟娟

鄭獬題金陵道中六國相排一局碁岸頭百草野烟微  
樹深啼鳥自相失山靜晚雲猶未歸濡口潮回殘照滿  
石城春盡亂花飛周郎屈指圖天下誰道江南玉鱸肥  
范文正公仲淹移丹陽郡先遊茅山作丹陽太守意何  
如先謁茅卿始下車展節事君三黜後收心奉道五旬  
初偶尋靈草逢芝圃欲叩真關借玉書不更從人問通  
塞天教吏隱接山居 贈茅山張道者有客平生愛白

雲無端年老尚紅塵只應金簡名猶在得見仙巖種玉人  
送陳瓌秀才遊金陵君有江南行為君歌以喜龍  
盤山萬曲練靜江千里江山不可空台星照吳中古來  
王謝地今有周召風幕間楊與鄭萬丈光相映煌煌聚  
宰府金陵一何盛此去知己賢雅客情無邊白雲起江  
樹明月逐江船雲月共徘徊優哉如遊仙歸來笑春風  
白日登青天

胡澹庵銓與正覺長老同遊蔣山寶公何似贊公房

是日



登寶好句還追鐵鳳翔

鐵鳳翔見贊公房詩

金象妙高驚地勝木

犀清遠送天香明年蠟屐誰猶健昨日登樓我尚強

閨高

百尺梯凡五折最難上

三老未應輸二老茲遊奇絕永難忘金

陵書事六代風流最永嘉鬱葱勝氣隱晴霞折衝樽俎  
神俱旺表裏山河險莫誇幾縷碧烟迷杏眼半篙清漲  
減蒲芽歌聲已得檀郎怨四海而今再一家

張乖崖詠郡齋述懷傍人往往羨清途野逸情懷亦自  
扶官舍四邊多種竹潮溝一面近生蘆病嫌對客低徊

甚老覺臨官氣味麤不信浮名是身累有時閒撚白髭鬚

晁吏部補之龍盤虎踞望南津餘烈崢嶸尚霸陳醉著不知風揭屋可能楊素是江神

洪駒父沙觜彎環轉拖牙一衣帶水遶城斜飛廉解使馮夷怒渡口風吹蕎麥花

夏文莊公竦金陵晚望雨霽吳城晚谿泉四散流禽歸半峰樹人在夕陽樓國望分江海星躔次斗牛堪嗟興

廢地千載有閒愁

韓南澗無咎永豐行丹陽湖中好風色晴日波光漾南  
北湖岸人家榆柳行風颭低昂似迎客繫船並岸聊一  
呼老農指示官田圩長衫紫領數百輩見我羅拜長嗟  
吁政和回頭五十載官築長圩宛然在東西相望五百  
圩有利由來得無害官圩民圩奚所拘此地無田但有  
湖圍湖作田事應爾底用徹地還龜魚民圩不堅自招  
水水潦何常鎮如此官圩六十里如城削平為湖定何

理請看今來未上場七百頃地雲堆黃縣官糴米三萬斛度僧給牒能商量我聞此語汗生面千聞豈如目一見吾君神聖坐九重輕易獻言誰復辨却憶吳中初夏時畚插去決湖田圍雞驚上籬犬上屋水至不得携妻兒無田赴水均一死善政養民那得爾寄言父老且深耕為汝馳書報天子

李忠定公綱金陵懷古六代兵戈王氣銷山圍故國自周遭豪華散滅城池古人物摧殘丘塚高阜轉蟠龍翔

寶塔洲分白鷺湧雲濤悠悠世事都如夢且對金尊把蟹  
螯 六代繁華三百年我來弔古一悽然景陽鐘斷雞  
空唱玉樹歌沈月自圓潮沒舊痕生晚浦柳搖新色媚  
晴天高樓上盡窮雙目千里江山遶檻前 六代興亡  
江上城倦遊還向此中行龍蟠虎踞空形勢井廢臺荒  
為戰爭雲氣霏霏春雨急烟波渺渺暮潮平商人不識  
前朝恨短笛還為激烈聲 六代當年恨最長兵戈陵  
滅故城荒非關霸氣俱消歇自是人謀未允臧王謝風

流今寂寞江山形勢亦淒涼我來正值興戎馬慨念東  
南更慘傷阻風泊慈湖夾焚香默禱有長魚躍波面  
江豚出沒舟人大驚抵暮風便因命解舟乘月泛江一  
夕至於金陵蓋數百里作二絕以紀其事江險不可行  
者為禁江江豚出沒白波中十丈神魚躍晚空知是陽  
侯憐我拙故教來助一帆風露氣漫漫欲結霜扁舟  
夜下秣陵江烟波如席月如畫快意倒盡黃金缸同李  
似之遊蔣山北風阻行舟駕言遊蔣山相携得良友談

笑窮躋攀松林靜杳冥殿閣羅烟鬟寶公骨已冷白塔  
孤雲間乘高望長空極目波濤翻東南正戎馬戈甲照  
江干與子適相遇偷此半日間懷古六朝遠道舊一笑  
歡憶昨賜對初接武玉殿班螭均珥史筆每慙追繼難  
迂疎與世違謫官隨甌蠻寬恩幸脫去假道來江關邂逅  
兩萍梗飄泊驚風旛回首顧淞河不知涕泗潛著鞭  
願努力世路方多艱登鍾山謁寶公塔寶公真至人  
烏爪金色身杖携刀尺拂語隱齊梁陳我登鍾山頂白

塔高嶙峋再拜禮雙足聊結香火因 題定林院行過  
鍾山到定林青松一徑白雲深三間古屋昭文館那有  
沈迷富貴心 題八功德水石作方池紫翠崖湛然定  
水貯瓊瑰何須功德標為八萬派圓成自此來 次韻  
上元宰胡俊明蔣山勤老唱和古風竺教流傳入中土  
以相求之無自可達磨西來直指心擬議之間已蹉過  
皮髓誰分深淺機祖禰翻貽子孫禍鍾山禪老真可人  
高唱宗風震江左學流雲集欲何為佛祖要須自心作



宰官倥傯牒訟間偷暇相從還作麼也知襟抱素相親  
更把篇章迭酬和詞嚴義密讀難曉字順文從誠皆妥  
應憐孤陋方杜門亦欲追隨良未果故將佳句寄幽人  
此意勤渠滋愧荷談空摩詰無一言聽法文殊非兩箇  
若將情解議真如明眼人前應看破世間萬法互低昂  
正若旋輪與推磨隨時俯仰乃善謀就中拙者無過我  
九折羊腸欲著鞭萬里滄溟思縱施祇今行年四十餘  
已覺衰頽多坐臥平生作具何所施盡以付之一畀火

迴光返照默自參妙湛本然無點浣公方齒壯志氣豪  
正可立功同魏顆胡為亦復味禪那坐視軒裳如繫鎖  
蓮社莊嚴清淨池丈室含容高廣座他時共結香火緣  
心期耿耿當非頗為余稽首問勤師如師材德誠磊砢  
釣龍羅鳳大江濱法器誰為語無墮庭前倘有立雪人  
我欲因風致三賀投金瀨有感楚王聽讒誅伍卿招  
呼二子同就烹子胥彎弓見使者義不戴天非惜生操  
瓢乞食困江表昌嘗一日忘郢城溧水之陽遇義女壺

漿簞食欣相迎當時追捕向爾急殺身滅口意豈輕霸  
吳何止服句踐破楚遂以鞭荆平倒行逆施道雖遠復  
仇據憤聖所稱却來訪舊欲報德歎息亡質隨流萍投  
金淺瀨亦何有聊以寓意通精誠哀窮進食類漂母解  
劍掛墓同延陵古人已矣不可見空有史筆垂英聲

自金陵江行未至長蘆阻風倏忽風雲接地陰扁舟繫  
纜暮江潄波濤何必深為阻萬里歸來一寸心 七日  
風不止歸心何似生烟添暮山色風撼滿江聲淮楚已

非遠波濤殊未平坐看雲解駁猶喜晚來晴

汪內翰藻過金陵六代興亡迹愈陳迹陳誰遣意如新  
古今更欲悲何事天地長留景似人雲壓山低惟妬晚  
霧蟠江濶更含春因知到此無窮感豈獨區區我一身  
食溧陽縣平生始到溧陽縣東野釣遊今幾年嵐光  
捲樹出孤日雨氣入山鳴百泉稻畦初秧秀色滿藤枝  
半折幽芳懸武陵商嶺政應爾倚杖欲去心茫然宿  
靖安鎮檣竿歷歷表中流暝宿河堤古驛頭天遣山川

渾著月人將榆柳共驚秋重來骨肉唯身在無限風烟  
到眼休得意枕中猶夢爾人生何況足悲愁

周丞相必大留別金陵韓帥仲通十二麟符玉截肪腰  
間仍映帶圍黃化行江國春常早訟息堦除日自長槐  
影緩趨三接畫堂陰先滿十連堂子淵去踏長安道待  
賦中和奏未央 又再點賓筵又一期千金敝帚賴提  
撕泮宮正采僖侯藻太學俄甘吏部釐人似塞鴻春向  
北心隨江水日潮西太平勲業須公助不用頻年戀節

犀次韻邢懷正孝庸通判遊蔣山仙人薄蓬萊乘槎  
渡河許舊觀桑田變今訪鍾山古駕言出東門恍若之  
帝所朝曦霽青霜楓葉落紅雨亭亭望浮圖隱隱插天  
宇坡垂北溟龍石臥南山虎遙聞飯後鐘絕勝紈如鼓  
恭惟布金地草木誰敢侮孤芳破冰雪喜見梅萼吐同  
遊皆大雅緇素競先覩巾車似元亮漱石雜孫楚相將  
挹靈泉何用照牛渚西方化人國未覺道修阻法筵盛  
龍象一一會心侶茗椀散午夢蒲團便軟語懸知雨花

社重辯風幡舞相投甚針芥味道真酪乳從來草堂靈  
俗駕回吾祖况如雲仍輩么麼那復數後車倘許隨未  
羨黃金塢

曾極題陳後主祠真珠簾下變離聲多少嬙妃掩袂聽  
羸得牢愁三萬斛孤舟撐入大梁城東晉斷簡殘編  
迹可尋諸賢興復不關心未應全罪王夷甫一任神州  
自陸沈漁父智士旁觀當局迷滄浪釣叟出陳詩江

頭風怒掀却屋底事全家醉不知

後主名一隱者問近  
曾作何詩云有漁父

詩風雨掀却屋  
全家醉不知

孫陵鵝眼錢六代初終幾變遷孫陵無

樹起寒烟青蚨細薄如榆筴猶是當年買笑錢澄心

堂紙楮生玉面務深藏未肯橫陳翰墨場一幅降牋何

用許價高緣寫宋文章南唐金銅香爐制作元從建

業宮形模奇古雜金銅烟昏塵暗君休笑曾在紅鸞扇

影中南唐宮中殘獐

南唐宮中忽得殘獐一枚陳陶云是夜狼星上直

周盧

巡徼列千兵那得殘獐墮禁庭鹿走棘生先有象天文

未必直狼星南唐遣使談鋒疊疊折強鄰專對當年



亦有人國老胸中兵百萬不將全力靠江神  
玉樹後庭花結綺臨春成草莽繁華都入暮烟中  
後庭玉樹迎秋色猶帶張妃臉上紅  
石麒麟短樊長塹起寒烟知  
是何人古墓田千歲石麟相對立肘駿膊焰故依然

石步道中有石麒麟數十地悴天荒丘壠平難從野老  
問衰興蒼烟落日低迷處折足麒麟記壞陵  
輜車姬

姦吳音今古同宮粧袷服已成空雕文結角輜車巧猶

有梁陳宮掖風

決囚燈

後主聽死囚燃燈決之囚家  
賂左右竊益膏油輒得不死

五詳三覆始施刑明滅蘭膏豈足憑可惜當年殺嚴續  
無人為益決囚燈江南錄自古櫻鱗或似狂按誅潘

佑事堪傷憑誰寄語徐常侍不殺忠臣國未亡鳳州

柳

鳳州柳蜀主與江南結婚求得其種鳳州出柳酒手

蜀主函封遣使時芳根元

自鳳州移柔萋醺醪今安在唯有青絲拂地垂三十

六陂渺然三十六陂春石黛潮生歲歲新楊柳杏花渾

好在吟邊只欠跨驢人金陵詩鑿地破除函谷帝埋

金壓勝郢中王興亡摠不關君事五百年前枉斷腸

古龍屏風宣和舊物建炎携之渡江宮官惜之裁剪背  
成屏風立殿上乘雲遊霧過江東繪事當年笑葉公可  
恨橫空千丈勢剪裁今入小屏風

楊虞部備詠鍾山周子無心隱姓名裂荷焚艾使猿驚  
不能高枕雲中臥瑣屑貪它墨綬榮石頭城五城樓  
雉各相望山水英靈宅帝王此地定由天造險古來長  
恃作金湯太初宮三軍不食武昌魚萬騎時遷建業  
居會得紫髯開國意太初名是作宮初白都山駕鶴

駭驚自古聞策名仙籍是真君  
天邊舊跡無尋處滿目  
青山空白雲 陸機宅陸家兄弟頗能文  
入洛仍將筆  
硯焚舊宅荆榛狐兔窟機雲無復有  
昆雲 天闕山牛頭天際碧凝嵐  
王導無稽亦妄談若指遠山為上闕  
長安應合指終南 靈和蜀柳得地恩  
深雨露偏丹墀左右玉階前  
君王厲意君知否好似風流一少年  
梅梁殿玉案金鑪對御牀  
歸然應似魯靈光螭頭直上雙魚  
尾不讓西京舊栢梁 臺城六朝遺跡  
舊山川遠想繁

華一悵然江令白頭歸故國多情合賦黍離篇 金城  
柳風絮烟絲春復秋攀條何故淚雙流因憐樹老猶青  
眼不覺人衰已白頭 潛鶴鼓雷門擊破使人驚潛鶴  
雙飛上玉清怪得舊時聲太遠聞天合似九臯鳴 乘  
黃署執轡何人籍帝臺漢家天馬不時來疲驚多亦費  
芻粟莫惜千金市駿材 銅螭署挈壺傳箭逼天聰鑄  
出蟠螭巧範銅何事腹中藏怪物人驚螭蜺氣如虹  
錦署人衣藍縷地衣紅不念家家杼柚空厥篚織文應

歲貢更翻新樣集機工 絕地列戟高門氣自雄主人  
應是偶相逢由來禍福皆人召此地無辜喚作凶 清  
暑殿穿地簾光映水明玉鉤斜處月初生龍皮席上鵝  
毛扇何必風來暑始清 促粧鐘枕面鐘聲及早催錦  
衾香疊百花堆蟾蜍影落珊瑚架照得仙娥下界來

青溪姑曩不乘龍即跨魚岸傍人復乞靈無柳如眉黛  
花如面聞是青溪一小姑 披香殿獸口金香烟穗濃  
螭頭玉照露華融蕭郎的是春光主曾作春衣此殿中

東澗行拖葛屨坐藜牀竹樹蕭然一水傍枕上白雲  
船下月卜隣東澗勝東岡青溪柵傾城傾國兩妃嬪  
此地聞名不見人潛想舊時紅粉血落花風裏步香塵  
江令宅竹木池臺尚儼然歸時頭鬢雪霜寒青溪隱  
映朱門處曾屬中書一品官

劉彥冲金陵懷古荒城莽莽蔽荆榛虎踞龍盤迹已陳  
赤壁戰爭江照鏡青樓歌舞鳥鳴春千年王氣雄圖盡  
一疊寒笳客恨新折屐風流猶可想祇今高臥豈無人

楊誠齋萬里陪留守全處恭總領錢進思提刑傅景仁  
遊清涼寺山自新亭走下來化為一虎首重面平吞雪  
浪三江水卧對雨花千丈臺點檢故城遺趾在淒涼浩  
歎宿雲開六朝蹤跡登臨徧底事茲遊獨壯哉 萬里  
長江天上來石頭却欲打江回青山外面周如削紫府  
中間劃洞開蘇峻戰場今草樹仲謀廟貌古塵埃多情  
白鷺洲前水月落潮生聲自哀 已守臺城更石城不  
知併力或分營六師祇遣環天闕一壘真成借寇兵間



者王蘇俱解此冤哉隗協可憐生若言虎踞渾堪倚萬  
歲千秋無戰爭 賀建康帥全處恭迎寶公禱雨隨應  
大士多時不入城入城猶未炷爐熏忽吹淮水千峰雨  
不費鍾山半朶雲桑葉秧苗俱起舞葵花萱草亦歡欣  
尚書欸送公歸去留下豐年二十分 橫山再見橫山  
滴眼新山曾勸我脫官身燈籠簫鼓年年社酒醖鶯花  
處處人忽憶諸公牡丹會轉頭五柞去年春野雲墟月  
空荒寺兩袖寒風一帽塵 辛亥元日送章德茂自建

康移帥江陵極知借寇未多時道是徵黃有近期不割  
半青江令宅却飛大白習家池湖山解語云來暮淮水  
無情也去思莫近鄉關動歸興輕黃一點上雙眉西  
湖一別忽三年白首相從豈偶然到得我來恰君去正  
當臘後與春前醉餘犯雪追征帽送了憑欄望去船待  
把衣冠掛神武看渠勲業上凌烟金陵官舍後圃散  
策江梅未落杏先繁萱草都齊柳半園却是淺寒花較  
耐東風未要十分溫旋種花窠二百株不知種了有

花無阿誰便向春工說急擣紅藍染玉酥 過秦淮曉  
過新橋啟轎窻要看春水弄春光東風作急驚詩眼攪  
亂垂楊兩岸黃 過笪橋輕風欲動没人知早被垂楊  
報酒旗行到笪橋中半處鍾山飛入轎窻來 登鳳凰  
臺千年百尺鳳凰臺送盡潮回鳳不回白鷺北頭江草  
合烏衣西面杏花開龍蟠虎踞山川在古往今來鼓角  
哀只有謫仙留句處春風掌管拂蛛煤 行闕養種園  
千葉杏花不信東皇也有私如何偏寵杏花枝於中更

出紅千葉且道此花奇不奇 白白紅紅兩不真重重

疊疊是精神誰言跂石眠雲客也見長楊五柞春 和

傅景仁遊清涼寺舊時月過女牆頭風雨摧頽廢不修  
地老天荒無處問松聲灘響替人愁祥刑使者來何暮  
弔古詩篇清更幽收拾江山入懷袖却歸講席進鴻疇

夏日雜興金陵六月曉猶寒近北天時較少暄打盡  
來禽那待熟半開萱草已先翻獨龍岡頂青千摺十字  
河頭碧一痕九郡報來都雨足插秧收麥喜村村 圩

田周遭圩岸繚金城一眼圩田翠不分行到秋苗初熟  
處翠茸錦上織黃雲古來圩岸護隄防岸岸行行種  
綠楊歲久樹根無寸土綠楊走入水中央早起秣陵  
鎮人趁林中市雞鳴檐上籠忽看一天紫未吐半輪紅  
誰撼扶桑露吹來楊柳風詩肩忍涼冷已出兩山峰

山路祇言迴農家俱夙興短長羣稚子迴避一田塍隨  
犬能知路騎牛底用繩茲行有勝事何處不豐登路  
口回望方山鍾阜回頭失方山戀眼寒似巾簷短帽如

覆玉瑯槃每恨青蒼遠因行反覆看歸時記面目城裏  
指雲端 橫山已過方山了橫山更絕奇爭高一尖喜

妬逸衆青追萬馬頭驚撈千旗脚恣吹娟峰恰三五隔

柳尚參差

凡十五峯從南數起第三最高尖

汀丁詞十解江東水鄉隄

河兩涯而田其中謂之圩農家云圩者圍也內以圍田  
外以圍水蓋河高而田反在水下沿隄通斗門每門疏  
港以溉田故有豐年而無水患余自溧水縣南一舍所  
登蒲塘河小舟至孔鎮水行十二里備見水之曲折上

自池陽下至當塗圩河皆通大江而蒲塘河之下十里  
所有湖曰石臼廣八十里河入湖湖入江鄉有圩長歲  
晏水落則集圩丁曰具土石捷菑以修圩余因作詞以  
擬劉夢得竹枝柳枝之聲以授圩丁之修圩者歌之以  
相其勞云圩田元是一平湖憑仗兒郎築作圩萬雉長  
城倩誰守兩隄楊柳當防夫何代何人作此圩石頑土  
膩鐵難如年年二月桃花水一律流歸石臼湖上通建  
德下當塗千里江湖繚一圩本是陽侯水精國天公勅

賜上農夫南望雙峰抹綠明一峰起立一峰橫不知圩  
裏田多少直到峰根不見塍兩岸沿隄有水門萬波隨  
吐復隨吞君看紅蓼花邊脚補去修來無水痕年年圩  
長集圩丁不要招呼自要行萬杵一鳴千畝土大呼高  
唱總齊聲兒郎辛苦莫呼天一日修圩一歲眠六七月  
頭無點雨試登高處望圩田岸頭石板紫縱橫不是修  
圩是築城傳語赫連莫蒸土霸圖未必賽春耕河水還  
高港水低千枝萬派曲穿畦斗門一閉君休笑要省水



從人指揮圩上人牽水上航從頭檢點萬農桑即非使  
者秋行部乃是圩翁曉按莊宿牧牛亭秦太師墳庵  
函關只有一穰侯瀛館寧無再帝丘天極八重心未死  
台星三點圻方休只看壁後新亭策恐作移中屬國羞  
今日牛羊上丘壠不知丞相更嗔不暮年起大獄必殺  
張德遠胡邦衡等  
五十餘人不知諸公殺盡將欲何為奏垂上而卒故有新亭之句然初節似蘇子卿而晚謬兒姪新  
亭相迎送客新亭恰放燈兒曹迎我復新亭百年事業  
何為者送往迎來過一生

任希夷南朝故迹惟天禧鳳凰臺鹿苑寺郝氏窟為最  
久有梟何取臺儀鳳事佛空知后作蛇狐穴蟻巢零落  
盡却能留此梵王家 行宮口號絳闕前頭天闕橫春  
烟收盡兩峰青中流淮水成河漢旁列鍾山作御屏

新青染徧金堤柳廢綠羞開玉樹花今代離宮呈氣象  
六朝荒址滿桑麻 石頭城石城只解著王蘇漫說夷  
吾計亦疎儘使西風能舉扇可堪重見伯仁書 城東  
懷古謝安遊處猶留墅李白吟邊亦有亭兩地東山春

寂寂至今白下柳青青 鍾山城如虎踞來擒虎山號

盤龍屬卧龍天險不能回運去地靈元自要人雄 同

劉武子孫季和遊鍾山和劉武子韻有客新從蜀道還

共招北隱步松間何人寫出秋風句付與淮南大小山

臺城隋家耕壟徧陳宮留得鍾山蔣郡東只怕東南

分王氣那知零落錦帆風 題謝氏山居風流誰似謝

家安不愛蒼生祇愛閒今日雲孫仍不惡一間茅屋尚

東山 鍾山春遊青樓醺醖客中聖碧苑鞦韆人半仙

春滿江南佳麗地綠楊芳草思娟娟  
柳邊淮水一般綠花底鍾山分外青  
閒趣遊絲不知遠夕陽纔過已踈星

劉龍洲過登金陵清涼寺臺江南江北許多山到處登  
臨得凭欄老木換丹霜有信怒濤拍岸水生寒倦遊半  
世烏三匝往事千年指一彈落日正西催上馬依依回  
首望長安

王崕清涼寺竹賦稜欒兮娟娟玉立兮露寒翠青葱兮

蒼蔚鳳鸞舞兮琅玕風之來兮天之庭過巘谷兮韻秋  
聲金鏢碎兮滿墜日暉暉兮淨明若有人焉凜高節歷  
歲寒兮傲霜雪我欲從之兮路修絕隔秋水兮共明月  
李山甫上元懷古南朝天子愛風流盡守江山不到頭  
總是戰爭收拾得却因歌舞破除休堯將道德終無敵  
秦把金湯可自由試問繁華何處在雨苔烟草石城秋  
爭帝國王德盡衰驟興馳騫亦何為君臣都是一場  
笑家國共成千載悲排岸遠檣森似櫟落波殘照赫如

旗今朝城上難回首不見樓船索戰時

張南軒拭送胡伯逢之官金陵相望數舍已云踈遠別  
何因執子祛漫仕想應同捧檄舊聞當不廢觀書月明  
淮水空陳迹山繞新亭有故墟暇日更須頻訪古因來  
為我道何如

趙汝鑒金陵作龍虎帝住宅鳳凰仙子臺六朝遺事冷  
八月夜潮回隴鴈秋初到江花晚自開憑高一樽酒何  
代獨無才

施文煇金陵作紫蓋東南久寂寥石城烟霧壓宮堯登  
臺倦客懷千古宿內閒人夢六朝御苑雲浮曾拾翠舊  
橋月落尚吹簫諸公不說新亭事目斷空江半日潮  
袁泰初金陵懷古晉委東都帝秣陵豈無機會可爭衡  
諸公坐視敵來往一水反為國重輕北伐上章空有語  
中流擊楫竟何成登臨不是多傷感老却胸中十萬兵  
吳陵金陵懷古烟雲莽莽對窮秋六代雄豪見古丘萬  
里長波東赴海千年閒客獨登樓山川冥漠天難問運

數推移地莫留終信東南多王氣浙中今是帝王州  
劉滄經過金陵六代興衰曾此地西風露泣白蘋花烟  
波浩渺空亡國楊柳蕭條有幾家楚塞秋光晴入樹浙  
江殘雨晚生霞淒涼處處漁樵路鳥去人歸山影斜  
李巽巖濤詩看盡庵前手種松草堂聊復少從容令人  
却憶騎驢老悔不終身作卧龍 昇元古寺寶靈珠照  
影東西與衆殊本為仁皇賁潜府豈知今日鎮留都  
余尚書端禮勸農石頭城賦詩去年出郊春欲半鍾阜



林巒青未遍今年此日蟄初驚動地春光滿石城柳如  
甌金梅碾玉川原高下麥苗綠一聲布穀已催人吳儂  
莫問春遲速蒼顏老守政無奇只要我民不苦飢奉詔  
偕行兩赤令職在勸耕無擾之鮐背龐眉數十叟聽取  
吾言醉此酒但遣兒郎力南畝不患三錢無米斗米斗  
三錢大江東從今更祝八方同同見三登太平日老守  
不願萬戶封

葉暉詠清凉寺竹茂林修竹綠侵雲清到心中賴有君

李主當年飽涼後民間苦熱幾曾聞

薛許昌詩南朝三十六英雄角逐興亡盡此中有國有  
家皆是夢為龍為虎亦成空殘花舊宅悲江令落日青  
山弔謝公畢竟霸圖何物在石麟無主卧秋風

王寔齋遂鳳凰臺詩天連宮闕雲烟濕地接淮山日月  
低不知何處兩黃鵠飛向白雲雲外歸天上十分月  
人間一半秋笙歌傳小寨燈火認層樓酒怕初斟滿  
暮欣未了收分明渾似水只是欠雙鷗

劉後村克莊金陵作高牙拂雲車帶雨清曉西州氣成  
霧玉麟堂上少文書白鷺亭前多杖屨古來此地一都  
會城郭樓臺盡非故落日矇矓江北山斷烟髣髴新亭  
路神州豈但夷甫責西風更有元規汚是中端的得長  
城正自不能堪短簿戲馬頻從九日遊南樓許共諸君  
佳眼前突兀坡老碑醉裏吟哦謫仙句只今蕙帳怨猿  
鶴想見齊盟憶鷗鷺淮南四月蠶麥熟宮闕山河煩卧  
護了知此意誠能馴未許尋公遂初賦 鳳凰臺晚眺

經月踈行臺上路秣陵城郭忽秋風馬嘶衛霍空營裏  
螢起齊梁廢苑中野寺舊曾開玉帳翠華人不幸離宮  
小儒記得隆興事閒對山僧說魏公

羅必元金陵作六朝遺跡舊山川萬里長江當守邊一  
念易驕人事廢不關飛渡北來船 凭高懷古思悠悠  
遙想騎驢白下游不是龍眠圖畫裏如今親到蔣山頭  
金蓮步金陵佳麗不虛傳浦浦荷花水上仙未會與  
民同樂意却於宮裏看金蓮 清涼寺竹清涼世界竹

如雲舊日君王愛此君時代改遷龍變化荒山啼鳥不堪聞

王周金陵作杳杳金陵路難禁欲斷魂雨晴山有態風晚水無痕遠色千檣岸愁聲一笛村如何遣懷抱詩畢自開尊

陳丞相俊卿蔣山謝雨詩農事春郊閔雨時乞靈奔走寶公祠鑪中沈水纔三祝天外油雲已四垂蔌蔌通宵茅屋冷青青破曉麥田滋更祈三日滂然澤大作豐年

遍海涯

范石湖成大禱雨用陳丞相韻  
撫原陂壻莫春時夾路  
鑪薰共禱祠喚起雲頭千嶂湧  
飛來雨脚萬絲垂無情  
梅塢猶紅綻有意秧田盡綠滋  
大施門開須滿願願均  
此施布天涯

江寧令張伯子視旱田賦呈上元主簿楊明卿輪蹄旦  
旦風塵表入眼羣山青未了刺藤迎日子先紅蕎麥得  
霜花漸老叢祠詭怪畫村曠古寺騫騰出林杪征衫多

次逐飛鳶下檐有時隨宿鳥初晴得去恨遲遲獨夜不  
眠憂悄悄公如老驥暫伏櫪我類游鯨終屈沼一朝王  
事有期會百里民情同探討詳於禹貢辨等級明似離  
婁燭幽渺高依丘壘或微收低近陂塘翻盡槁凶荒有  
數合均一報應於中又分曉不能究實害非淺倘使從  
寬恩豈小茲行到處欲春風批放莫教分數少

張祁遊鍾阜呈同集諸公曉出白下門東山聳孱顏脫  
身塵市中辦此一日間西風忽凜冽秋容著堅頑烟樹

小搖落寒雲起爛斑但驚節物變敢辭登陟艱諸峰互  
嶄絕落勢相廻環盤固建康城儼若呵神姦造化鍾英  
靈盡壓東南山厚疑接坤軸高欲窺帝關太平嚴梵剎  
華屋羅千間向來劫燒灰舊觀初未還象教豈易滅佛  
力不可扳風雷運梁棟斤斧勤輸般會見落成日千門  
響銅環山僧肯分甘我亦誅茅管人生少會心勝處天  
所慳歸韉理殘照欲去仍躋攀後會倘可約此興殊未  
闌祇恐俗士駕頻來遭詆訕哦詩記幽討賸語君其刪



程內翰玘建業賦醉庵居士間從二客繫孤舟呼短策  
陟層城之岌嶭望故宮之崔嵬山勢降伏大江東奔客  
有誦金陵之詩歌赤壁之詞如懷古如怨今咿鳴流涕  
悲不自勝居士曰子無使然客曰天時既冬夜氣將分  
水連烟重月帶霜明隕周郎之涕愴謝安之望傷周顗  
之情子獨何能恣然於斯乎居士行且笑徐語客曰宇  
宙間興亡何足深悲英雄豪傑乘時可為登戰場過故  
都必悽然悵然如閨女望夫之時此蓋騷人墨客借助

筆端之愁語而非天生上智經營八紘之長規也客愧  
且謝於是相與指畫山川極望中原嘆昔人之庸陋而  
遺大功于指顧之間既而席地布酒酒酣歌發曉風翻  
樹潮來海口挽客登舟急赴行在用栢梁體題式敬  
齋惟古知哲粲青編胡為典獄難其賢臯陶蘇公相後  
先舍是未見書聯翩果哉知仁人難全未得其情智欲  
研既悉其罪乃寬旃吾心釣石何所偏服而舍之天則  
然畫冠不犯何由緣教明化洽上所宣上失其道民乃

愆又復淫刑如蔓延立法初意浸天淵苗民作威天棄  
捐聖神應運符握乾春風甘雨徧八埏內外建官相綜  
絃州復設掾職其專此蓋椎輪當益虔縣令獄掾非充  
員渠用資格宜加銓邢君天資靜不僂且嘗一飲詩書  
泉大府獄市來聞闐嚴明之長日趨前莫難此時周折  
還三年一心上通天荻苗水長問歸船而君胡為華此  
扁吾非空扁乃心傳上遡蘇公歲二千下視方來漫無  
邊吾乃渺然丘中焉來者式之不計年題朝陽亭暉

暉朝陽亭亭前鍾阜青巖陰尚積雪光彩浮初晴亭下  
清溪水滑流新泮冰雙鳬知隨陽亦逐流漸行亭中賢  
主人快此景物清開門延客入掬雪當泉烹凌蹙淮水  
漲修鱗爛銀瓶更酌秦淮春配此玉豉羹了無一物俗  
表裏俱蓬瀛宇宙有佳致心清境乃并甚愛主人賢澹  
然遺世營不言飲人和恂恂發天誠清處亦絕奇亭亭  
秋露莖胸中足丘壑城頭亦林垌不與風月期結屋謾  
茅菁却慚最下客形穢識不靈宿懍幽深趣侵尋塵坐

櫻一官冷於鐵癡坐如凍蠅喚來俎豆間不知梅已英  
清賞可無傳陋語恐難徵春風送鵬程曠言尋此盟  
登忠武卞公墓底用荒村訪野墳青編相對儼如存當  
年但識清談樂今日方知節槩尊千載腐儒空弔古幾  
章冷語自銷魂何當僇力清河洛一洗新亭舊淚痕

金陵驛鐵甕高資只半程柴溝晚發暮金陵莫言三宿  
何濡滯已覺匆匆役此生登石頭城邂逅鄉人却異  
方蹇驢仍得庾東陽不妨令節隨流水自看寒花吐晚

香微岸綸巾風力勁小亭飛醺午陰長不堪細數淮南  
樹獨倚青冥興欲狂別金陵校官舍雙栢手自移時  
尺許長三年拂拂及宮牆願言勿負栽培力保此堅貞  
傲雪霜

馬野亭之純詠臺城吳時後苑晉宮城見得當時似玉  
京往事茫茫同水遠長郊渺渺與雲平珠璣常向耕鋤  
得禁籞今為陌路行只有月華還似舊徘徊花上聽寒  
更石麒麟石虎石羊還石人此間獨有石麒麟定應

側近藏陵墓仗此威靈護鬼神一石琢成高且大兩頭  
相望儼如真參天宰木知何在今與漁樵作四鄰斷  
碑百尺豐碑立路南盡停車馬試來看不知神道是誰  
墓為問康王何代官初謂流傳須永永安知磨滅已漫  
漫姓名不足標青史休把將來礎石觀鍾山石城為  
虎此為龍都邑無如此地雄萬壑千巘皆拱北三江七  
澤盡朝東埋金依舊祥光現鑿浦仍前地脉通吳晉六  
朝嘗已驗如今留鑰比關中石頭城幾年聞說石頭

城初謂堅牢似削成只是一拳如卓望初非四面有樓  
棚依山最好防車騎舉目何妨矚賊營為問區區徒自  
守何如席卷向宸京幕府山當初一馬過江來幕府  
權宜向此開萬里封疆吾舊物一時賓客爾多才建臺  
此事雖堪羨掩泣其人更可哀相視不曾言及此欲教  
天意此時回靈和殿前蜀柳此柳栽從蜀郡移宮中  
諸柳不能垂祇緣草木根靈異非是乾坤雨露私輕似  
行雲清似水軟於吹絮細於絲風流可愛如何比最是



風生月上時 天闕山不知象魏欲何為布政頒條總  
在茲凡有往來須仰視庶幾衆庶可周知後來江左當  
新造好向城隅踵舊規却指牛頭作天闕此言多少被  
人嗤 清暑殿見說當時百尺梁四圍修竹翠雲長正  
當盛暑都無熱不有薰風亦自涼郡與人間同日月直  
疑天上兩陰陽有時更取龍皮浸凜凜如飛六月霜  
梅梁殿太極初時欠一梁漂流偶見石城傍曾聞禹廟  
還如此可見川祗欲效祥不但千年無朽蠹能令滿殿

有芬香要將盛事傳來世畫出梅花十丈長  
潛鶴鼓板木為腔冒以皮其中寧有鶴來棲如何音響聞西洛  
未必源流自會稽既被兵人都擊破却云禽鳥不鳴嘶  
分明偽妄無人辨可笑諸人識見迷促粧鐘禁鼓城  
頭報五更景陽樓上打鐘聲祇疑髣髴天將曉不省徘徊  
月尚明閃閃青燈星戶綴鬆鬆綠鬢霧窗橫蜂黃蝶  
粉都描得那有鴉兒畫不成銅螭署洛陽當日鑄銅螭  
徒得形模怪且奇玉刺口中藏不見蟲居腹內出無時

移來建業尚如此徙在江陵無復茲此說流傳真誕妄  
便當不信不須疑 金城柳金城四面柳為營此日征  
西路再經憶昔僅能高咫尺如今端可拂青冥清眸漸  
隔花中霧綠髮俄懸鏡裏星功業未成多少事攀枝挽  
葉淚淋零 東山謝安人物江南第一流居常不肯利  
名求壯年甘向東山隱暇日須將妓女遊既與斯人嘗  
共樂固應有患即同憂後來一為蒼生起破敵成功祇  
坐籌 披香殿繡栢藻井栢為梁翡翠簾櫳映壁璫寶

篆烟雲凝馥郁華林錦綺競紛芳荷花永晝湘江靜桂  
子西風陌路長最是春衣裁已就領巾飄動盡天香

古越城府城西北瓦棺東尚有遺基在此中旋折纔方  
二里許規模不得小邦同正當進取爭強霸聊作屯營  
備敵衝老死智謀曾不識却云爭似建康宮 西州城  
運漬居東西治城西州遺迹甚分明多言東晉纔經始  
或說孫吳已創成池苑春風羅綺市樓臺夜月管絃聲  
入門盡是嬉遊地惟有羊公不願行 王導宅當時一

馬渡江來幕府山頭刈草萊四海紛披都似此一時締  
創亦艱哉朝綱治具提還挈國本人心壅更培輔佐中  
興功第一應須千尺上雲臺陸機宅只聞二陸住華  
亭却有書堂在秣陵如此弟兄無比擬翕然京洛有聲  
稱辭亡著論真難及受命專征若易能十萬河橋俱潰  
散儒生虛語不堪憑沈約宅飽觀明月雙溪水徧倚  
清風八詠樓但見遺蹤留婺女安知故宅在昇州文章  
至好雖堪羨節行全虧亦可羞看得齊梁相禪際只宜

稱隱不稱侯 江總宅青溪第宅關鮮妍最是江家宅  
可憐路上行人爭指處橋邊遺跡尚依然南冠辭往長  
安日北客歸來建鄴年惜此屋廬還似舊不知曾讀泰  
離篇 三山九華境上曾親歷五老峰前亦屢過不似  
三山殊媚好何須千仞極差栽翠圍宛似屏間畫綠折  
全如水上波況與滄江苦相近見來心眼定如何

翁思齋迹已未秋登城北樓脚底江南第一州臺城北  
上小淹留難忘故國千年恨不盡長江萬古流目斷中

原誰擊楫秋來多雨獨登樓舉頭忽見長安日一醉能  
消太白愁陪周溪園登賞心亭建業城樓四面窻賞  
心勝處冠南邦石頭西峙雲藏寺水面南浮月滿江故  
國秋深人自老新河夜遁敵誰降高人登眺同懷古忽  
有飛來白鷺雙

### 樂府

王介甫桂枝香

古今詞話云金陵懷古寄詞於桂枝香凡三十餘首獨介甫最為絕唱

登

臨縱目正故國晚秋天氣初肅瀟洒澄江似練翠峰如

簇征帆去掉殘陽裏背西風酒旗斜矗綵舟雲淡星河  
鷺起畫圖難足念自昔豪華競逐悵門外樓頭悲恨  
相續千古憑高望眼謾嗟榮辱六朝舊事隨流水但寒  
烟衰草凝綠至今商女時時尚歌後庭遺曲

周邦彥金陵懷古佳麗地南朝盛事誰記山圍故國遶  
清江髻鬟對起怒濤寂寞打空城風檣遙度天際斷崖  
樹猶倒倚莫愁艇子曾繫空餘舊迹鬱蒼蒼霧沈半壘  
夜深月過女牆來傷心東畔淮水酒旗戲鼓甚處是



市一作想依稀王謝鄰里燕子不知何世向尋常巷陌人

家相對如說興亡斜陽裏隔浦蓮迹拍

溧水縣圖如射亭避暑作

新篁搖動翠葆曲徑通深窈夏果收新脆金丸驚落飛  
鳥濃靄迷岸草蛙聲鬧驟雨鳴池沼水亭小浮萍破

處簾花簷影

一作簷花簷影

顛倒綸巾羽扇困卧北窗清曉屏

裏吳山夢自到驚覺依然身在江表

鶴冲天

溧水縣長壽鄉

作梅雨霽暑風和高柳亂蟬多小園臺榭遠池波魚戲  
動新荷薄紗厨輕羽扇枕冷簟涼深院此時情緒此

時天無事小神仙

馬子嚴卜算子慢壁月上極浦帆落人撾鼓石城倒影  
深夜魚龍舞佳氣鬱鬱紫闕騰雲雨回首分今古千載  
是和非夕陽中雙燕語 向人訴記玉井轆轤脂漲  
膩幾許蛾眉妬感歎息花好隨風去流景如羽且共樂  
昇平不須後庭玉樹

張于湖孝祥西江月

題溧陽三塔寺

問訊湖邊春色重來又是

三年東風吹我過湖船楊柳絲絲拂面世路如今已慣

此心到處悠然寒光亭下水如天飛起沙鷗一片

程內翰秘滿江紅

登石頭城歸已月生

頗恨登臨浪商作騷人愁

語石城上何須苦說死袁生褚當日卧龍商略處秦淮

王氣真何許與君來蕭瑟北風寒黃雲暮枕鍾阜湖

玄武生此虎真蹲踞看四山環合休臨江渚可笑唐人

無意度却言此虎凌波去君且住明月為人來潮生浦

王潛齋楚六州歌頭龍蟠虎踞今古帝王州水如淮山

似洛鳳來遊五雲浮宇宙無終極千載恨六朝事同一

夢休更問莫閒愁風景悠悠得似青溪曲着我扁舟對  
殘烟衰草滿目是清秋白鷺汀洲夕陽收黃旗紫蓋  
中興運鍾王氣護金甌駐遊蹕開行殿夾朱樓送華輶  
萬里長江險集鴻雁列貔貅掃關河清海岱志應酬機  
會何常鶴唳風聲處天意人謀臣今雖老未遣壯心休  
擊楫中流

景定建康志卷三十七